

黎文僖公集

黎文僖公集卷之一

序

送段仲廣歸毘陵序

毘陵故家稱段氏厥彥曰宏字仲廣前少司寇永號默菴之仲子今建藩大叅伯誠之弟永平郡判汝齊之尊甫也初默菴第永樂甲申進士

太宗文皇帝選之入翰林為庶吉士讀中秘書當時預選者凡二十八人以應天之二十八宿默菴尤穎敏過人文采浚發厥名籍甚焉後累官戶刑二部侍郎功載信史至今縉紳家猶稱道之仲廣上奉伯誠友于孝敬以從事家訓之嚴所以濟美於前人者盛矣下撫汝齊

游泳詩書以迓續聲光之遠所以延慶於後嗣者深矣
故今汝齊判永平政蹟顯著雖其性氣之美問學之富
使然要亦由祖父德善有以基之也歲在闕逢君灘是
為天順八年汝齊治行既脩奉入既裕慨念色養久曠
然不可離官守而為禮也乃走使迎仲廣來公所就養
焉仲廣初入境見農嬉于野賁安于肆行旅肅于塗甚
喜及過聽事見官僚皆蹈禮法羣吏治文書整而和靜
宇寂然無一塵雜又甚喜已而抵于公署見外囂不入
內政肅齊子姓滿前森茁蘭桂稱觴上壽連酌數十醕
悅而愈醒其大喜又加于前矣明日走謝太守周公曰
幸有子不墜家教得從賢大夫成此盛美實惟老夫之

樂大守曰汝齊之賢翁則成之吾資之有濟亦良幸也
於是永平人咸以謂仲廣克孝于先侍郎為能子克恭
於今大叅為難弟克遺芳于通判君用昌其政治為賢
明父而感發興起相勸為善者在在有焉居數月將南
還刺灤州鄭公實其姻舊也因馳价京師屬予言贈之
嗟夫有子克家蒙畫所稱幹父之蠱蠱文著象若仲廣
父子於蒙蠱義兩全矣茲歸也尚務崇乃名德以篤慶
若嗣我慶之所篤官之所遷也官之所遷即恩命寵嘉
所存至也繼此可以勉圖乎於是備其事之始終而為
序此仲廣其敬繹之

送進士馮惟和知山陽縣序

今縣令古諸侯子男爵也於民有父母之道最親近焉
我國家撫綏區夏歷百餘年類簡諸名進士為之雖
其志不願此亦彊之行此非薄進士而欲以煩劇勞之
也聖人愛民無所不用其極欲得此甲科第一流人發
摠所蘊為朝廷宣布德澤以達之元元使萬億含靈
均被養育而隆太平之基於永久也是則所以重進士
也不然以今海內觀之大州劇縣奚啻千餘然而綰符
作宰承流宣化使惠利不壅於下政務畢集於上吏稱
民安異績著聞者進士耳臨四通八達之衝兵旅時加
饑饉荐臻而區畫有方剿裁有術使足兵足食一方無
擾者進士耳黠吏豪胥積習成風一旦驟加銜勒若不

可制然抑揚操縱寬猛適中不能出吾規矩之外終於
服從者進士耳侵漁之魁方務逢迎貧病之衆久曠生
理而事上撫下忠誠感格卒之豺虎不敢鳴吾民血肉
者進士耳積歲進負克補而完之者進士耳歷時枉濫
克辨而伸之者進士耳治遐陬僻壤飭惰農以興民利
脩廢學以起一風還流徙屏寇攘以寧一疆土者進士
耳視民所休戚爲之敷達于宸聰而建革之者進士耳
受代之日私家無餘財公邑有厚積去雖久而民懷之
者進士耳凡此皆進士皆兼有之無難致者是豈不
起入敬重哉是故外焉陟守長進牧伯內焉擢憲臺泣
卽署比者皆接踵而來有不待九載而後達是誠進士

優於治民顯融攸在而忠良寢谷國與亦豈有少爽歟
浮梁馮君諱字惟和荆荆湖蘄鎮至誠主器也以景泰
甲戌進士授令浙之平湖於前之九善既備舉矣既而
丁外難去服闋調淮之山陽吾知君所以仁惠山陽者
必有加於平湖而所謂九善者又將於今見焉君勉圖
之君盛年富學有猷有為有守而蘄鎮公亦嘗由進士
尹縣累官前職君之名位適與等匹蓋父子濟美云吏
科給事中沈廷實喜其邑得賢宰徵言於予因書此以
頌

慶孔宗學授南京監察御史序

嘉魚為縣隸武昌武昌其鉅姓則孔氏實甲乙也孔之彥曰

儒字宗學舉景泰庚午鄉薦高第明年辭乙榜卒業大學九歷十餘載術業大備卓有聲譽馬天順癸未夏謁選銓曹遂僉舉入南臺理刑辟既周半載考稱拜南京浙江道監察御史有官守言責矣維時南北縉紳士相與為故舊者莫不嘉宗學之博洽多聞問學足以明道也教宗學之廉公有守德行足以潤身也重宗學之通敏有為不茹柔不吐剛材器足以集事也而進士龔德輝請予言贈之自予入宦翰林於朝著著事宜多所習見嘗觀古君子謂聖人以天下為一家中國為一人心竊疑之及今諦觀我國家所以建官用人通融內外則與人之一身真無異也蓋人之一身有腹心有耳目有

股肱有爪牙有支節皮膚之類館閣者腹心也臺諫者耳目也卿列統文輔股肱也將帥領武校爪牙也方岳大臣藩臬之寄支節皮膚之類也腹心則欲其清泰耳目則欲其聰明股肱則欲其彊壯爪牙則欲其堅利支節皮膚之類則欲其和平無恙惟如是然後一氣流行脉絡通暢百體舉安而天下無難理矣宗學以其英妙之質當

聖天子嗣登大寶之初起而服官政首當耳目之任年方富力益彊以樹功名建事業於我國家為一體祠成之慶進而延福永久此其榮為何如哉或曰耳目在人之身衆體攸繫今建官何獨貴之御史欺曰洪範五

事視聽為要而舜詢四岳首言明四目達四聰伊尹告
太甲拳拳於視遠惟明聽德惟聰耳目見重於人耳尚
矣耳目見重於人身即御史見重於天下吾宗學之得
不知所自重哉知所以自重則必能思所以自立近之
罄竭忠讜寵承恩命以貴二親於壽考遠之超擢官階
荐歷卿尹以榮臺省於將來名垂竹帛慶流餘裔皆發
軔於此耳宗學最之遂書此為贈云

榮節堂詩序

榮節堂建在四明山之高橋今河南右叅政使章公尚
素素其母太恭人俞氏如珪之堂也初太恭人歸章氏
適竟以問右從實京師河南公世父智和以其籍徙父

智通則主供億焉太恭人居居養姑誠孝詳懇嘗顯天以愈姑疾及智通卒京邸又克歸其柩葬之如禮謝却父母命斷髮誓死義不二天勤勞母婦之事救勉河南公善繼述旁推其仁撫諸孤從皆成人而河南公遂舉進士甲科歷兵工刑三部主事獲推恩封母為太安人尋進郎中副兩憲司使事陞今職有司具疏太安人閭操聞于上有詔旌其門曰貞節而今又獲進封太恭人懿德崇名豐祿吉福皆昂來而未艾鄉人士因取榮節為堂之字且冀懋慶澤為太恭人壽良可喜哉堂舊有聖天子所賜勅詔璽書暨太常少卿兼翰林侍讀學士劉先生主靜傳翰林學士柯先生孟時記朝之薦紳海

內大夫士詩賦風歌曲殆百首而簡元未序河南公乃
走書以屬予惟天地之間人為貴人之有夫妻母子寔
綱常所在亦教化所繇以行風俗所繇以厚也自夫世
降以來變而為凱風吹棘喪而為綴狐在梁散亂而為
中谷之推草吾於此不忍言夫人道之變之難處矣昔
者聖人為世道計於是乎化教率勸以扶植綱常以風
厲貞節恒惓惓焉故讀漢廣知文王能化漢女守端莊
之節讀行露知周男子不敢陵貞女之節讀栢舟知世
子妻自克守義以全其節讀蠨蛸知諸侯化行而詩人
刺無禮者之失其節讀伯兮知周之女婦念君子而持
靜一之節聖人刪詩類有取於此焉意亦可見矣夫三

百篇卓矣今此諸作鏗鏘韶濩以寫太恭人之貞行之
榮名之遠大福慶煥星斗而麗雲霞兼備體制韻味既
深且永其亦有得於漢廣諸篇之遺法歟其亦能知我
國家所以貴太恭人者即成周之世貴尚貞女之良意
歟列女傳曰女子之行親也孝婦也節母也義而慈止
矣然則太恭人既止於義慈詩之者亦克止於禮義而
不敢過是雖不襲古詩之辭而古詩之意固在是爾詩
有序所以言作者之意彙而序之為一編以昭示來世
使諷誦之優游涵泳興起至德為風化助不亦宜哉予
庸書此以復於河南公若夫移母氏事夫之節為人子
事君之節以其家所以親親之孝為國貴貴之忠純誠

格天上益母壽忠義格君增進母榮則公家訓素已講明於此諸篇什槩已及之茲不旅屑

送孫世榮知順慶府序

天順癸未春當朝覲述職之期

聖天子體元居正大振乾綱嘉與萬邦圖新化理乃舉虞周試功計治之典大合羣吏旌別其淑慝者而黜陟之凡罷遣千餘輩泰寧之治煥然一新焉維時順慶舊守既黜而戶部陝西司主事貴池孫侯世榮遂以大臣僉舉進守順慶銜命以行巴西人京仕者聞之皆喜其得賢父母而大司徒暨貳卿以下亦皆器許之以此為官屬之榮屬郎中龐復理徵予贈言順慶古巴子國近

代惟隸以西南兩充今則併寶城宕渠咸安而兼隸之
凡統二州七縣東川大郡也其為地有嘉陵大江襟帶
於左金泉栖樂諸山雄峙於右物產豐饒人材素盛非
富於學問有材器者烏充優為牧守哉侯自景泰辛
未進士拜戶部主事調工部行水金鄉再調戶部歷
中外凡十載餘所至政有成蹟聲價赫然以起所謂富
於學問有材器而優為牧守者非侯其誰歟然則熟知
稼穡則可勸乃農桑之業熟習制度則可均乃力役之
征熟明經史則可興乃學校之風熟練簡書則可清乃
案牘之弊熟講律令則可斷乃獄訟之惑熟行教化則
可息乃盜賊之凶勸農仁也均役義也興學禮也清案

智也斷獄忠也息盜厚也此六術者皆牧民之利器侯
皆預養而素熟之至於臨事特舉此而措之爾抑予又
聞巴西為郡唐有史謙恕而百姓足食歡其來晚宋有
邵伯溫而名山勝景題品無遺此皆古太守之賢者而
今此之民皆願侯為史而不願為郡何歟意者謙恕之
孜孜為民於六術庶乎兼備而伯溫之朝夕觴詠非所
急務也侯慎擇而行

送徐公器陞右僉都御史巡撫陝西序

往年徐公領薦于鄉舉景泰辛未進士高第拜工科給
事中敷奏詳明便便言得近臣體激揚果敢寒謬自持
叅稽復逆惟允惟公人謂若公之賢雖歲中起遷至大

夫不次見拔以示勸羣臣可也居無何僅得賜勅祭二
親尋陞右給事中丁內艱去服闋改兵科進都給事中
十年勞勩猶帶舊樹於此莫克以厭滿諧縉紳之期望
矣乃天順甲申春適今

聖天子嗣登大寶秋欽春生一新造化有詔九臺端卿
尹之執事邇防未協輿論者黜之九罷遣五六輩而公
遂由衆舉超進右僉都御史奉勅守西陽縉紳士於是
翕然稱賞知公之才不當局於小成而可寄以萬里之
民命公之官不可限於資格而當受明揚於大廷公之
事功不可混於衆流而當特立於真元會合之日將來
我武惟揚解使漢南無庭障太平之治相安於千百年

之遠率由於此其慶幸宜何如哉夫臺僉國之大臣也
西陲我之要地也以大臣而臨要地愚請得以八事上
告可乎夫據地以圖方畧如趙充國之在金城則國勢
張選將以督戎帥如尹吉甫之共武服則兵聲振練兵
以雄卒伍如方叔之簡車徒則軍謀壯與利以足邊儲
如武侯之田渭南則國用舒裕民以脩馬政如僖公之
牧坰野則戎備足習藝以精器械如李德裕之請弓弩
則外侮息立法以嚴條約如范仲淹之質羌酋則威命
行聽納以攬忠謀如徐玠之築招賢館則衆益集此八
事者律之以一廉濟之以一勤而持之以一公慎公之
學皆足以明此尚何有不克成者哉公行矣翼夕有執

法一星无燭西疆而拱向紫微垣之上必有信於微也
維時鄉曲羣卿相與稱慶屬贈以言予因書此以懋進
公於遠大蓋不敢以今人視之也公名氏章字公器世
家羅山父信民嘗以春秋齒胄子將膺大用有志未就
而公克繼成之乃移孝為忠者其立身有本云

贈曾彥理任杭州府別駕序

錢塘為浙東西舍府地富嘉山水自宋建南都以來五
方雜居俗趨工巧羞質樸而尚華麗寢入侈靡焉我
國家溥仁隆禮陶鑄餘百年其君子皆秀而文小人皆
勤事而易使信哉聲教所及人無不感化也南郡曾侯
思義字彥理以盱江節推書最陞判錢塘郡將其監州

治行又與古之人麗美而有利於今有光於昔矣雖然
彥理楚之俊傑也其擢科第時文聲響潘泉間及齒曹
子大司成嘉其賢試政都憲臺羣多使敬其勤慎出而
推肝江撫明公恕克舉厥職仁于庶獄旁恤餘力以勸
農桑均賦役興學校勵科目脩禮文賑貧乏肅兵戎恤
匠藝節財費美風俗庶事精練敦本抑末粲然可觀部
使者上其績于朝

天子為賜勅旌之贈其父母以為世勸遠其終任而去
也數萬人伏闕惜留不可得則卸其一革履以誌惠愛
於無已足則舉素所懷為之人而置諸恒所易為之地
飽帆順流一日千里夫何難哉夫君子挾材以為善則

善無不至矣今侯善佐守長惠寬庶民外蕪其操以律
已則華麗之習自銷金玉其德以感人則侈靡之風自
熄權衡百度之來以裁庶事則繁劇之務自理雖由此
而陞陟華要亦無不可侯其懋敬以圖之侯之行戶部
員外郎陳易之嘗學春秋於侯義有攸重請予文贐之
予因錄其始末而遠大以期之

送知襄陽縣李士傑書最還任序

今襄陽去京師餘二千里中間大郡小邑凡歷數百而
獨襄陽為縣田野無惰農其小民皆饒於衣食市廛無
暴客其商賈皆樂於懋遷道塗無逋寇其賓旅皆安於
寢興齋堂無曠士其僚彥皆勉於職業郵驛無稽程其

使命皆喜於奔趨掾曹無點吏其案牘皆勤於奉理閭
井無豪胥其徭賦皆主於均平園囿無滯囚其訟牒皆
急於斷遣自公署暨壇壝學廟廨宇傳舍煥然一新山
東西流民來附者日以千數咸得寧止部使者及藩臬
諸卿交口稱揚時或連章薦之名震京國行何善政而
得此哉今邑令前廣西道監察御史榮昌李侯士傑教
令明肅而使然也夫教令之行自律身始侯何以律之
一廉足以銷萬欲而又濟之汲勤保之以慎固宜其成
效必然也初侯舉景泰首科進士拜前職內肅縉紳外
按州縣寒窘有剛直風天順初首倡羣豪言時政之蠹
狡先望鷹反為所排調去甫踰一二年侯所言一一皆

驗憲紀增光其忠義固已著聞

先朝矣惟人臣忠義雖天地可通鬼神可格而况襄陽之民醇雅易治烏有不化服乎古者擢用臺諫職專言責間有罷除旋復收用如宋之四諫及唐介呂誨諸公是已以侯之忠義而又有此治行之超卓然未承環召於今日者豈非江漢要衝之地非得侯之賢莫克成治故留之歟豈非吏治貴久任必終九載然後陟其明燠抑豈非良金以百煉而成器故置此煩勞之地庸玉侯于成乃大用歟侯能遺峴山之愛而流漢水之名則雖一邑令而可與羊叔子杜元凱同芳顯融之來尚未可限量也歲甲申春侯滿兩考來報政有司書其政績第

一有 詔俾還任於是襄陽大夫士相與供帳都門而
河南道監察御史父天錫求言為贈予因書此解之且
徵諸方來者以為忠義之勸云

送工部右侍郎吳公致事還閔詩序

予往年嘗道出涿鹿過保定抵于上谷而臨乎易水之
濱觀見我 國家積薪之會所環其四面凡二百里餘
通衢巨厥中每十里浚一井雜蒔樹木以憩行人而萬
夫雲來羣材嶽峙行者熙熙居者怡怡役作者孳孳不
敢少怠上無侈取下無濫費可以給千百年之用而無
窮因問其人何若是之勤事而安皆曰此我少司空吳
公之惠所遺也及官于朝則見吳公公松髯鸛髮其形和

其志剛尊賢友義樂善好施禮足以服權貴智足以周
下情於此益信我國家之多賢矣蓋公聞之仁惠里
人初判海鹽吳江遂陞吳江令調栢鄉滿考書最進官
歷屯田都水二司主事天順初元擢右通政尋陞今職
總理國薪凡十有餘年而今則壽七十有三老且倦矣
先是公屢上七疏懇以引年辭
先皇帝惜公才賢不允而公請益堅歲在闕逢浥灘是
為天順之八年

今天子嗣登大寶有詔許優老公遂再疏以請從之公
於斯時拂衣振袂浩然而往南望故園心曠神怡其樂
為何如哉夫四時之序成功者退士君子成功身退天

道也茲歸也吾見三峯五虎之顛越廟榕城之下南臺
東海之前後所在有白髮翁數人絃琴賦詩飲酒奕棋
棹明月歌清風終日不息而莫知其老有類於耆英會
中人者必公及我學士林先生諸故舊也而較之今顯
仕者沈酣富貴昏曠荒迷而莫知止以此方公之明哲
其賢不肖何如哉公之行朝著縉紳皆有詩贈其友大
覺月潭詩僧也嘉公之高尚寫其故園勝槩并系以諸
作贈之予時方送林先生歸而又見公事固樂言也於
是終始其事而序此以冠於珠玉云

送知吉州伍廷玉書最還任序

吉州古文成郡禹貢冀州之域亦狄虺咎如之國春秋

之屈邑即其地也漢為北屈縣唐為慈州元改吉州今
仍之而其勝槩有壺口鍾靈表正疆域孟門挺秀環抱
郊閭民生其中大抵節儉簡畧有陶唐之遺風初無難
理也近數年來牧養者乏賢類皆急利峻刑以臨之民
四出奔逸百度廢弛殆不勝其艱苦矣吾故人南邵伍
君琇字廷玉舉進士于鄉以太學高等往司其牧事始
至破厓岸除煩瑣勤勤懇懇一切撫之以寬仁有若父
母然人曰舊長政專嚴明其酷烈猛如火火民猶棄背
而何有於寬仁君曰不然也吾之官乃民之父母烏有
父母專任刑罰驚駭其赤子而可治家乎顧養育未盡
道耳於是親愛益篤綏懷益至甫半歲民之去者還病

者起彊者化逋負者告完殘缺者復舊坤吟者變為謳
歌學校以興農桑以足盜賊以屏廟壇之祭祀無曠置
郵之使命無滯囹圄之獄訟無淹庠政惟和聲名籍甚
而凡部使者及藩臬諸大臣於君咸加禮敬共歎服其
得牧民之體非彼舊守長可同為之騰章以聞請加制
旌異為羣有司勸其榮矣哉君既滿一考未天官報政
遂特書上考有詔俾還任而吏科左給事中程道遠倡
縉紳贈以詩什屬予序之昔者司馬遷作史記謂循吏
者奉法循理不尚威嚴而民自化是又可為今循吏矣
君歸而益懋厥循益堅乃操 國家推賢讓能令與具
在將如漢之賜璽增秩者非望於君而誰歟君敬勗之

送譙文美同知南康府序

岷山南走中原萬餘里度挂嶺而北經表筠之西峙為廬阜書傳指廬阜為敷淺原即其地也南康置郡在廬阜東北以俗康得名而地富嘉山水不臨要衝無煩兵鎮民業耕漁以相安於無事之天賦廉役輕部使者及藩臬諸卿非時出不經其地蓋大江以南最簡靜處也然自有郡縣來迄今不知幾千百年其綰銅虎而坐別駕有光汗簡者史不多見惟唐之韋應物宋之周茂叔朱元晦暨我朝王子充四三君子名尤顯而應物肆情遊賞茂叔避地養病皆不久淹郡職獨元晦在守成時值歲歉採薪有功後又請于朝建白鹿書院子充遇

開創時披荆榛建府署撫摩瘡痍搜剔姦蠹民至千今
思之豈其他賢守佐皆以為地僻民寡可以臥治而無
事建置之紛紜乃爾靜默歟殆其山水之樂可以娛人
雖尋竒覽勝亦可畢公事而有所未暇也夫有山水必
有人民師帥承宣牧養攸繫是固不可樂其地之勝而
忽其民之憂矣吾故人譙侯文義以景泰庚午鄉薦高
第升胄子釋褐拜今職其所居之位即子克之位也以
文義之聰明才辨氣豪雄而識明敏量洪大而守端確
經術精通兼知吏事而一心於仁愛將來功業必可與
子克儼美見稱信史而克積之久英華發越豈無賢名
上聞殿陛如子克之被徵命膺高爵哉此誠君子尚友

之道文義懋進以圖焉可也文義名蹟別號栢亭其先尊甫彥規嘗為縣滎昌多善政蓋家慶有自云

送張景昭陞江西按察司僉事序

零陵張君鑑字景昭以禮經魁鄉薦舉天順丁丑進士甲科拜南京尚書戶部主事精敏理財弗虧邦賦為大司徒所器重丁外艱去服闋改任刑部仍前職又克明慎折獄弗撓權勢為大司寇所敬信焉既而陞員外郎踰年進秩正五品陞僉江西按察司事今按察司即古之監司所以監方伯連率而振舉郡邑之紀綱者其職在於糾吏治宣德澤省風謠賑孤寡舉逸民正士習督武備辨疑獄問勞苦刑姦宄十者兼備始能厥官又非

特理財折獄二者而已也朝之縉紳咸謂景昭之才不
疑滯於物而能與世推移故隨所任用皆稱厥職予獨
以為不然景昭忠厚君子也惟忠則盡已之心以行事
而必底有成惟厚則循物之理以治人而不傷刻薄故
無所往而不宜景昭蓋有德以為才之本故也有德為
本而才濟之雖使大用於天下總持四方之憲紀亦
無不可而況於憲僉乎初景昭來北仕予嘗與論及
先皇考所以得人致治有益邦家之實在天順第一科
擢龍虎三百人當時百司庶府固多賢俊若南畿地秋
兩屬往年徑達並進其弗飾簞簋弗職下官以貽乃鄉
尹憂者何如

先皇考慎簡甲科而分任之意有攸在矣是故金玉材
猷以清正南畿地官事者吾天順第一科人也冰霜節
行以澄肅南畿秋官政者吾天順第一科人也迄今後
賢繼作一守成規以是益信武王十紂流澤成康而我
太宗科目取材迺利今日

先皇考所以用人者如是則盛德大業之敷遺後世者
尚可量哉景昭深以為然及今超登清秩又拜憲僉之
命追思疇昔寧不愴然人惟弗念

聖天子舊德而替其初心故臨事多懈景昭行鄉薦紳
士咸謂當有言贈予因述憲僉十事而追論前時委任
責成之明效冀景昭終始厥德用進於大成也景昭至

江西見同官陳夢祥楊崇仁亦以是語之

送唐質夫陞廣東按察司副使序

皇天純佑我國家肇新憲紀賚茲多賢弼亮神化
聖天子龍飛嗣統之明年赫然震怒奮發威靈勅命
執政大臣暨都憲官因朝會之期盡簡時牧伯監司及
郡邑長貳屬若弗稱任使悉黜之凡能遭數千輩萬物
吐氣百度一新凡此皆天意有攸在非人力所能為也
既而詔大臣論薦諸縉紳材行文學兼優且久任者
補其闕而陝西道監察御史山陰唐公質夫遂以薦陞
廣東按察司副使公初領正統丁卯鄉薦景泰甲戌舉
進士甲科拜御史克凜凜樹風采已見重於人天順已

卯巡按七閩於方岳諸卿激揚無遺監臨鄉試多得名
士壬午巡按陝右又以救荒弭盜備邊著稱中罹艱虞
出知新喻縣建成化初始召還復職公於夷險益始終
一節未嘗少變也尋掌三法司事於時政病民者輒侃
侃言之期必能革於章奏及四方機務皆所條畫每上
陳輒稱旨而疑獄多平反要囚皆丕蔽所謂材行文學
兼優且文任者非公而誰歟然則忠良顯遂超進七階
法駕驂駢朱軒就路天之意固不肯違於公矣而奉茲
星使採訪風謠廡鎮一方陳時臬事公之心亦豈肯違
於天哉夫揚虎豹之威者不徒志於蛟蟻厲鷹鷂之操
者不留心於燕雀今八桂失守濫及海南朝廷命將

征之固期蕩掃妖氛靜寧疆宇也然兵貴拙速不尚巧
久彼寇流海南宜先所急兵何以尚也於八桂兵也八
桂宜戒久暴師何以未底於凱還此其間必有遺筭未
盡舉者公試舉全策贊成之不可贊則條陳利病上言
斯於天討之公未必無補於萬一公敬懋焉公奉行此
天討之公是克勝其天憲之重而天職天祿之增進又
將與昔時常見素余安道交輝並煥副憲云乎哉維特
鄉縉紳亦仕者相與供祖帳餞之而予辱公厚善且以
兵我國之大事天所重也於是因御史袁仲昭之請叙
而言之

慶旌表義門王氏七世同居序

昔大同之世大道公行天下人但知由義未嘗名於義也中古淳熙俗變聖人懼人情蕩而無節始制為禮法檢束之有井田以均其養有比伍閭族以聯其居有鄉大夫州長以糾其行又有合宗之法以統其屬使家自為宗約天下皆歸於義而義之名始立焉至成王命相保釐東郊勤勤於旌別淑慝其曰惟德惟義時乃大訓義肩少替乎自井田壞而民得去鄉里聯居糾行之政不行宗法遂廢而義微矣大道隱而風氣漓借鋤取帚敦踈闢墻之俗寢興世道之降如此孔子所以嘆三代之英未之逮有繇然也雖然天理民彝之根於人心終不可泯世取一二人於千萬尚有敦行古道永為三代

之英者則夫操馭世之柄將運其轉移感動之機安可
不加激勵使知所勸而勉為善哉是故表厥宅里字其
民曰義民稱其門曰義門彰善癉惡名存與存君子不
能不重感於斯也乃成化紀元春

皇上嗣登大寶有詔民同居伍世者旌表為義門而石
首王宗義甫一門二百餘口已同居七世於是里耆列
其事於縣縣令長上之天府暨藩臬部使者覆按如制
以次達于儀曹大宗伯以聞 詔允之報下題其門曰
旌表七世同居義門王氏噫嘻榮哉王之先大源人宋
季有諱均者始徙家石首均三子槐楫權率能勤儉以
啓大其基孝友以豐亨其慶植本固浚源深矣槐生沼

沼生淑淵幹蠱敷貲宗緒並振叔淵二子明堡珂三子
宗本宗禮宗信堡五子宗義宗智宗倫宗賢宗道而宗
本宗倫各領鄉薦宗本丞臨清縣宗倫通判成都府宗
道教諭臨海昆從奕葉又皆有子若孫矣予往年過其
家見宗義主家政讀書達禮嚴重慎舉動宗倫宗道個
儻有學然怡怡如也皆有長者之風其下弟子數十人
恂恂如也出入必告隨才能授以事客至坐堂上左右
酒肴揖讓升降不離尺寸退省其私尊幼戚疎無間言
笄冠婚嫁葬祭必稽合家禮而閨門有禁庭塾有教貨
泉有掌宗戚廢弔有節賙卹有惠無一事非義也其門
以義旌不亦宜乎今天下義門舊稱浦江鄭氏十四世

同居子聞其四世孫德佳代弟德璋死而堡亦嘗
垆備書抵死易名徃代之遇赦免事與德珪合鄭氏八
世孫伯陽聞人有輕已言輒自責禁家僅勿訟而宗義
亦嘗有田為人結縣官奪之禁子弟勿訟田亦復還事
又與伯陽合王鄭之義易地皆然也茲欲復見大同之
世之民其在此乎雖然門以義旌固義矣所以維持斯
義非禮法何所憑藉歟今之禮法猶古之禮法也昔九
世同居如山東張然所持惟一忍合食上百口如九江
陳然所訓僅數言於禮法皆未盡惟鄭氏有家規百六
十八條為不悖聖人也聞鄭氏之風興起者有樂平虞
氏家規百四十六條澠池曹氏家規輯畧十四篇百六

十四條皆不過增損鄭氏舊規耳王氏亦聞鄭氏之風
興起者則家規惡可無哉禮法者家規之節度有禮法
以維持斯義而後有慶澤以迨長斯義凡為子孫者皆
將如鄭氏之多賢雖由七世以綿於百千世可也宗義
勉之吾兄浩與宗義姻連而吏科左給事中程道遠宗
倫館甥也請予言贈遂不辭而敬為書此

送江西按察司僉事宋宗魯課最還任序

予始家食時讀書學文志存科第獨愛重正統壬戌甲
科大魁劉宣化榜所選拔皆天下知名士其表出三策
亦皆雄渾博雅有古人忠讜氣甚盛舉也當時四明宋
公儒字宗魯寔擢在優等尋聞公拜刑科給事中於時

政多所論駁糾正務全大體獲譽謗稱竊自計若公之
賢當必效古人歲中三遷其躋大用總大政未可量也
迄今二十有四年矣是為成化元年則始識公於京師
見公猶以江右僉憲終兩考來報政課最第一俾還任
回視同榜故人紆求曳紫濟濟蹌蹌周旋臺省之端廟
堂之上其名位較昔時甚遠若此者豈富貴在天固有
定命歟抑時宜所整寬厚和同者多速達而廉直剛方
者乃遲進歟抑亦權衡人物者自有其術而非人所能
測歟公既被命朝之薦紳多致嘆於此而公未嘗心
乎此也太僕生言於衆曰仁者惟務竭忠不肯以崇卑
易心智者乃善適時不能以緩速芥意公之官五品僉

憲臺事雖若緩於諸卿列然克樹風采卓有休聞其激揚所及有春生之惠秋歛之威焉且得專行之無礙是其職業在官未下於諸卿列矣肅政有暇則表章羣籍為後學開入道之門而公亦自有著述可傳世是其事功在人未減於諸卿矣累茲職業之弘事功之富雖神明可通物理可盡而泥於宦達乎所謂紆朱曳紫周旋臺省之端廟堂之上者安知早晚不於公見之而重為宣化榜榮耀也耶公敬憊以俟焉於是繕摺羣法從相與供帳都門餞之而尚書刑部主事李文盛丘時雍輩各有詩贈之大雅生乃錄其始末作序文并諸首以解之

送宋紹東知崇明縣序

國家舊典守令惟天官卿循常例銓注

今天子初嗣位即勅大臣簡四方守令之弗稱者罷遣之而代以賢哲懼常度銓注者未精當也然而

聖人愛民無所不用其極頃又以大臣言錄郡守陞京官縣令則聚國子生發身科目者羣試之擇其學識優等之人然後寄以百里之命非雋科目者弗預士君子讀書領薦心存利濟亦何幸而獲遇茲嘉會哉齊安宋侯允字紹東以麟經舉景泰丙子鄉闈高第屢試春官弗偶卒業胄子試居前列拜知姑蘇之崇明縣侯為人頽悟而篤實公正而寬和其經術精通可以博古今其

治材敏贍可以達事變絃歌百里蓋所優為易易爾若
夫擴充涵養以造于遠大雖使承流宣化牧千里之邦
致君澤民卿萬里之國皆無不可而况於尹一邑乎崇
明古州治屬廬江領西沙三沙二縣我 國省州併為
一縣改屬姑蘇其地僻在東海隅距郡治無二日程而
百年仁義之澤安養生息水生陸產富甲鄰邦人物之
盛又倍蓰前朝矣然近數年來時或海水泛而民化為
魚鼈天雨闕而物燎為灰燼此豈非世道泰寧之極而
君子治泰之道有未盡歟愚以謂民之師帥職有攸司
必也誠足以格地則海斯晏而免懷襄敬足以感天則
雨斯時而有以卒歲誠敬吾楚人所素有也古之賢令

於此類多能行之感召無爽侯試勉焉所謂千里萬里之榮將繇茲而權輿矣侯與予鄉榜同年辱知最深其行也鄉縉紳相率祖餞而胄子友李本清請予言此

送王克脩陞吉安府學教授序

今天下儒道之盛稱江右而江右士風之盛首吉安吉安之民其游歌郡學補弟子員者凡四五百而屬縣學亦各有二三百外此講授山林之下獻賦之間者不預焉每當大比年則生儒畢來川湧雲集縣數千百人冀發摠所蘊為有司採錄然而每歲江右僑鄉榜者吉安恒半之明年甲科亦聯名數十人斯亦世所罕有矣往時君子論此歸諸山川之鍾靈風俗之趨向予獨以謂

不然也儒道與世道相表裏道由人弘是蓋

聖天子在上宗主吾道賢師友在下陶鑄斯文乃致茲
盛美云爾豈山川與風俗所得專哉臨海王先生克脩
以正統甲子乙榜歷訓導武進教諭金壇所在教有成
績成化紀元初陞吉安郡教授以先生學行老成而官
于多文之地譬諸造工師翰具殿材于營丘山中若箍
黏若魄旌若豫章叢叢然動中繩墨隨所取用無不宜
者而先生又謹其矩度申其制作倡率衆工師毋玩歲
月毋急程期敬作而寬待焉必至於材具衆美而殿以
成夫然後廬陵故都薦賢能榮龍虎者既盛而愈盛若
工師翰之賞賚必有大於今日者先生之功業顧不熈

歟抑予於此又有告焉夫吉安文士之多在衆人誠為
美矣然小試於部使者暨藩臬諸卿類駭曰此諸人耗
吾財也勞吾防範也勤苦吾遴選也率比而去之十存
一二不皆以為美何耶夫

聖人因人情而制禮禮誠有節不能盡取然使有志者
皆憂愁抑鬱飲恨而往彼父兄子弟皆喪氣而垂首此
於人情近乎於國法當乎意孟蔑片肉何損於公蒿蘆
木几何益於下與其厭多而驅逐孰若集衆長而精擇
與其竣事而多取餘羨孰若當事而豐其稟既先生遇
小試時試以去就爭之使彼有志者皆得預焉毋為有
司所限可也先生之行其武進弟子刑部主事吳本深

暨吉安縉紳與先生之鄉人京仕者咸來求言為贈予
偶念及此遂并書以為贈云

送周子建陞知徽州府序

君主天下以擇賢守長仁天下民為初政第一事此帝
舜紹堯咨救之意我

聖朝家法然也乃成化紀元之四年今天官卿李公由
都憲來主天選適新安缺守李公言于

上曰惟新安畿大郡民繁政劇非有學有守而材識
足以濟事者莫堪是任若今刑部員外郎周正其庶幾
乎 詔可之於是周侯遂進秩古二千石拜守新安郡
而 朝之公卿下暨大夫士咸歡忻稱慶謂

聖天子克任賢守以仁斯民天官卿克薦賢以公天選一新天曹首務新安仕者亦皆同辭頌美謂吾卿繼此將必囿於雍和熙皞之域噫榮矣哉侯字子建先世家吉之文江以戎籍徙遼陽領山東鄉薦天順丁丑舉進士甲科拜工部主事嘗董役

裕陵廩勤蕪濟聲名籍甚遂陞員外郎及改刑部於凡大小刑獄益加明慎斷決無帶今茲陞擢蓋其學守材識素孚於人乃爾也公之行諸法從故人暨龍虎舊游相與供帳都門言別而太僕生預焉酒既行或曰新安為郡在萬山間地富秣泉之勝今其千尋練帶可濯我纓萬仞花屏可縱吾目周侯政暇偕二三朋輩出將以

觴以詠將必大有樂事乎太樸生曰未也是徒為樂身
非所以樂民或又曰新安古文獻淵藪今廡洛流風猶
有存者而紫陽摘梓寔產于茲凡祠宇所以享神靈載
籍所以明道義周侯又將增益開大以厚斯文乎太樸
生曰亦未也是宜於古非所以宜於今衆乃起而問曰
然則何以為周侯贈太樸生曰仁者公其愛弗重於已
而忽民智者行其學弗泥於古而不通於今吾冀侯取
任昉之廉潔以肅其行守徐摛之安靜以定其入整而
律令按更以秋弘而器度惠友以春夫然後人已一樂
也古今一道也勿悠悠於逸遊勿屑屑於浮文也進而
踐華履要外司方岳內陟卿尹無往不宜矣於是諸縉

紳喜曰我 國朝任賢以仁於天下而太僕生之言克
惇善以仁於故人此可贈矣請書之乃書之以為贈云

送御史顧廷望陞廣東按察司僉事序

往年四方戎政弗職有司徒為文具以忤紳閭而無其
實武備缺焉

先皇帝奮發威斷大合羣彘而遴選之拔其老成練達
素有威望為百僚敬憚者得十七人分布兩京暨十三
布政司專理戎政而陝西道監察御史金陵顧廷望遂
承福建之命蓋千載一時也然君子謂有天憲則有御
史御史之職在內達聰明振綱紀嚴體統明法律指摘
臧否而激揚之專彈劾之任在外採民謠按吏治省風

俗斷刑獄察姦宄以宣布威命而無所避遜若夫肅兵
練武特其有責中之一廷望材賢而久於此殆未盡厥
抱負歟及廷望既蒞政八閩戎籍分隸外藩者亦鮮乃
因其土俗所宜理之弗猛殘民靡寬廢事但取可足兵
爾然守之確斷之明甫涉年餘吏懾其威民懷其惠而
兵政亦完備固缺用其餘力旁樹風紀所謂內外諸憲
事皆次第振立非大有材能且善識時務者烏克爾哉
既滿六載還期適時國有事於廣東僉憲缺人諸大
臣乃謂熟知兵事且深得憲體堪此任者非廷望不可
遂疏名上請詔從之然則廷望陞法官特佐憲事出
按萬里之外宣勲名有命乃在今日歟將行群多相與

供帳都門餞之太僕生祝之曰龍泉雖利不斬蛟不盡
其能烏號雖良不落鵠不滿其望廷望雖有材賢尚遲
大用茲僉憲事於廣東獲預征討豈非乃有為之時乎
今之畔夷昔之友民也 朝廷推轂命將合三軍伐之
彼方泥於拙速草草獻捷而疏全國持久之道廷望建
二三英畧使用高宗伐鬼方孔明擒孟獲之策收成效
於萬全不亦善歟仕時鄉尹出兵弱者貪生可虜彊者
委軍爭利皆危道也廷望知彼知己而戰不死如余靖
經畧有方曹克明戰取神捷不尤大有功歟惟功之成
斯忠之盡高爵厚祿實基於此予日望之於是羣芳咸
曰若廷望詘於前伸於後將於斯言驗矣請書之遂授

簡而書為贈行序以別云

勅封徐母黃孺人輓詩序

古詩三百篇皆有序序所以言作者之意也是故其意
哀則序述其傷悼悽慘之情其意樂則序陳其懽忻和
暢之實其意怨慕而感慨則序論其抑鬱輓軻弔古興
懷之事序之言所在即詩之理所在也雖然在心為志
發言為詩而意又心之所發也天下之難感者莫如人
心今詩之哀樂感慕人心各有指趣非其意嚮在我何
以致是乎所以能使其意嚮在我非我之善感人又何
以致是乎吾今於 勅封徐母黃孺人慎肅之賢有徵
焉黃氏世為臨川碩宗至孺人之祖季侃父進脩始以

明經教授鄉間而家愈齊孺人適徐氏為家婦有六善
馬祖姑墜接折齒傷足孺人左右扶掖日進肉糜歲久
無怠祖姑憐之有祝願辭一也有自經者誣其家衆避
匿祖姑不能去賴孺人慰護且盡脫簪珥服飾俾誣者
滿所欲得釋二也痛姑李不逮養事繼姑曲盡禮意得
其懽心一家義聚五百餘食指恩愛惟均置田宅非義
不取三也相夫子輸粟千石濟飢又讓璽書之褒於
夫之弟四也教震器瓊舉進士甲科絲編脩進位侍講
猶倦倦命之師先哲以圖進脩勤儉清慎以保官祿躬
製細布二端遠之俾服以識手線五也既受封命服禮
服家人請別製文繡孺人洪安布素恐壞家法拒弗許

六也孺人備此六善身雖為法於閭閻名已生香於郡
邑安得不有以感人使敬慕哉然則今孺人之歿也凡
朝之縉紳暨海內章達之士以詩名者皆有輓詩連編
累牘豈非其母人之母感慕六善而傷悼悽慘之情不
能自已乃發於言乎此詩之所繇作亦序之所繇述也
夫父母有善為人子者不能知不智知之而不能使傳
於後不仁侍講公乃彙次諸作成一帙俾予序予因法
古詩三百篇言作者之意如此使天下後世皆知諸作
之有補而不可誣是為人子者皆當如侍講公之為母
善於無窮可也

送御史遼克振陞南京通政司右叅議序

聖天子紀元成化之三年東平廣海南定荆襄外攘既
舉內治益肅功德之隆卓冠千古維時東夷有作孽於
遼陽者邊塵屢警我軍戒嚴先是左都御史李公執中
御命往撫之恩威既著陸梁愈甚於是

上勅武靖侯趙公良佐統六軍往正其罪仍命李公總
督馬李公出疆抽鋒選銳釐我軍為五路自領中路餘
各命監察御史壹員監之今河南道監察御史邊君克
振適送兵來遂當左路蓋勍敵也克振披山通道直探
巢穴酣戰數十合虜勢遂衰既而中軍盡破虜營五路
皆捷賊衆大敗殲厥渠魁招納降附東土以寧捷聞
天顏大悅凱旋之日詔加李公太子少保吏部尚書

四御史各陞正五品而邊公陞南京通政司右叅議非常之舉也今東夷即古女直遺類在前朝所以肆虐中國者彼族黨糾聚孤行有雄傑大設領之其勢合也在今時所以久安於邊徼者我

祖宗為之支分節解使小酋各據一衛世襲其官而聽命朝廷其勢散也百年以來生聚已蕃由景泰迄今數十年惟其荼毒豈非螳螂禦轍自速災咎乎斯舉也汎掃千里痛快入心得春秋敵愾獻功之義其懋作懋賞不亦宜哉昔周成王四征弗庭綏厥兆民歸于宗周董正治官凡為人君者誠不可以治世而忽兵在當時若淮夷徐戎並起為亂而周公戡定撫綏備有成績凡為

人臣者亦不可以泥文而不知武故曰有文事者必有武備邊君有焉茲行也吾見敷奏復逆以宣

上德而達下情使南都百司庶務流通罔滯豈不在君乎夫養之深則其成之也大積之厚則其發之也宏君未滿一考而陞是拔發預非常之舉又由此而以贊政餘閒優仕優學廣庸非常之任異時或圖任舊人俾按兵於一方或超遷重任內都風紀外領旬宣俾隆武於天下又豈不在君乎君敬懋焉君之行同袍羣公相與供張饒行而文天錫康用和請贈此君名鏞字克振世家河間之任丘今戶部郎中世安叔子領景泰癸酉鄉薦授前職有材有行克揚憲紀嘗督理南畿馬政多惠

澤蓋家訓有自云

送永安縣學訓導陳文源序

古稱延平之民儉嗇而尚質學有淵源豈其地負山阻水為閩福之襟帶而鐔川合流峭壁萬仞龍泉太阿精爽具在有以鍾其靈秀於人而使然歟抑以楊龜山李愿中之流風餘韻猶有存者後之人克振起之而使不墜歟不然何其章甫逢掖之流產於斯者皆文質彬彬迄今猶爾邪永安屬縣延平其貳教久虛位臨海陳先生端字文源釋褐太學拜永安訓導則今日所以發鐔川山水之靈起儒先承墜之緒者非先生吾誰託哉先生上世家大江之西家季世有諱允中者始徙臨海之

松山允中之子肅雍嘉定間以狀元釋褐拜守廣東化
州其後又有諱之節者教維揚諱克明者宰武城皆以
文學顯則其世澤固深且長矣先生胤續慶源幼而穎
敏於經史無不讀尤熟於禮盛年脫悔吝於鄉闈以卒
業胄子雖其材可大用而辭尊居卑取永安便於養親
而吾道之行固有攸在初亦何負於君子讀書立身之
志願哉先生師永安試為我劔水之南而問焉有延平
書院者宋陳宓所建有溪山偉觀者真西山所記今其
文儒靈蹟固儼然在乎凡吾名教之道芳不可替也先
生大用之材當未必止此耳先生將啓行翰林庶吉士
謝鳴治以鄉曲之雅求言為贈敬書此以別云

哦松館詩序

新陽馮侯敏學釋褐胄子拜丞祁間之二年令尹祁侯
題其館舍曰哦松蓋取韓昌黎記崔斯立藍田縣丞廳
壁之義也 朝之縉紳暨海內士以詩名者各為風選
歌行律絕之類以道揚其義敏學書最來京學成一卷
求予序夫丞佐令者也於一縣事無鉅細皆得預聞自
昌黎倡哦松之說而後世之丞靡然嚮慕凡遇松則皆
託之寄情矣彼所謂例以嫌不可否事目吏署文書在
唯從不敢畧省或者在斯立則可在今之丞則不可乎
後之人又率以此為義譚且因之推重於人不置者無
乃有取於斯立之脫畧事故超出風塵於官政皆無所

學乎愚以謂觀乎聖人則見賢人昔沂上風雩之樂
孔子所深與而求赤之志亦所不棄事先有司承實同
體若敏學哦祁閭之松又當折衷以聖人之法凡事求
實得焉不可游心虛遠也且松者為世之良材哦之誠
有實得則其味又甚深長蓋松之操孔子所知於此哦
之可以堅吾節松之材閭宮所取於此哦之可以宏吾
器松之陰秦人所貴於此哦之可以廣吾譽松之壽小
雅所稱於此哦之可以益吾年斯誠敏學吟哦有實得
者詩人之所與亦吾所深與也彼斯立焉足以知此敏
學名志在祁閭有幹有守得循良體部使者已騰章請
旌異寔致顯融而所居位予先大夫之位也所產三男

子長善琴次皆學春秋有成業又將有嗣子而起者乎
請書此以冠羣玉云

送劉克光還邠州序

古稱邠俗最忠厚考諸詩可見矣今去成周二千七百
餘年其鄉士大夫家猶且上下交相愛敬少長循禮義
豐儉適品節與詩所稱若出一時意者太華紫微鍾毓
神秀涇水金泉涵泳靈輝與天地相為無窮而后稷公
劉之風化淪肌浹髓萬古長在至我朝有餘年來深
仁厚澤又從而培植之作新之久益豐碩宜其忠厚常
與古同也邠隱者劉公暉字克光即其人歟克光今大
司空克明之兄讀書循理以勤約厚生遵信義崇行檢

正直謙慎肅齊門庭天順壬午嘗輸粟助邊餉

詔賜冠帶榮其身雖芳聯棣萼家食厚祿富矣而鉅鉢
軒冕不以嬰其心也雖慶顯冠裳身居尊行貴矣而塵
芥金玉不以撓其志也其素履固高出衆人數等矣而
允隆禮以交其弔懋德以儀範其子繕及姪紳純等使
世族益蕃且整茲宣非所謂邠俗忠厚之明驗乎初大
司空舉進士甲科拜給事中克光嘗一來京不久別去
既而大司空歷陞銀臺叅議左通政工部右侍郎聯遠
凡二十年矣成化己亥冬進今秩紳已授春官主事滿
一考而克光年逾七十矣憶弟看雲愈老增嘔歲庚子
純又領鄉薦克光遂攜純并問侯來京夫以白髮仁兄

省高爵賢弟於公署以積慶之世父撫濟美之子姪於
莫年填篋迭鳴丹世_和洽別雖久而竟忘年雖高而愈
健縉紳大夫嘉之相與載酒崇肴登堂拜慶而克光衣
冠儼若尊_姐秩然無侈靡無踈簡無錯雜促迫一惟古
禮之是蹈茲又豈非邠俗少長循禮義豐儉適品節之
餘韻乎然則若克光者雖為三代之莫可也此其人宜
天所有壽人所必尊也明年辛丑春克光桑梓興念又
將西還於是公卿相與設高會贈別而吾家宰尹公於
克光有故人之誼屬贈以言昔二蘇相與彭城處其變
然慶變而不失其常今克光來京華聚首處其常則處
常當載申其約以大司空為國柱石眷顧方隆早晚

進階公孤筮增家慶克光雖老復惠然肯來也又或紳
膺不次之擢純有甲科之薦皆當躬親來覲豈得忘情
乎於是各進三爵勗克光醉別而書此素練俟於將來
叢桂堂詩序

世人言植桂非真知桂者段成式云西河吳剛學仙有
過謫令入月伐桂其樹高五百丈隨斫隨合虞喜安云
視月初生見仙人之足漸起成形桂樹後生焉二說皆
誕月陰之精也其閭處微動者大地山河影耳使人物
在月中何所憑著至於以仙人有過況舉子不倫以桂
樹有形為後生不實且桂何罪必欲伐之宋寶禹鈞五
子及第人贈詩云靈椿一株老丹桂五枝芳其詞理宏

博不專指此也吾鄉地上桂叢生者取其有五善焉味甘辛性溫熱君主百藥臣而使之能補中導氣愈風痺諸病久服輕身惠也製其華可參菓茗融其液可釀酒漿以供燕享香馥逼人通也有菌桂有牡桂有木桂有板桂用各不同其在枝條為陽主發散在身榦為陰主宣利宜也秀發巖嶺不間雜木移植嶺北則性緩貞也枝葉冬夏常青不渝介也惠者仁之濟生道也通者禮之助儀文也宜者義之適時措也真者智之知困守也介者信之執常度也凡物皆稟氣一偏惟桂於五常乃若全具以此言桂斯無辱舉子與竇氏五子堯肖彼贈者其有所見乎大理楊氏其先汴人元季有諱良者官

提舉占籍太和今五世矣良生祥國初官經歷祥之
後有諱椿及子淵者儼壁聯瑞禧由御史陞知廣西府
歷叅政致事子淵領鄉薦教諭蓬溪今封兵部員外郎
子淵產五丈夫子長晉治春秋隱為義官次紳治易領
庚午鄉薦知萬縣次經治書領癸酉鄉薦教諭通江次
緯治禮記領庚午鄉薦舉甲戌進士屢遷廣東叅政次
繹治詩領丙子鄉薦舉庚辰進士歷陞兵部郎中五子
分治五經而四登鄉榜二擢甲科與禹鈞五子無異繹
從弟佐仍治禮記領辛卯鄉薦其下羣從分理舊業家
世益榮子淵回名其祖宅中堂為叢桂堂蓋以五經英
華發在五子五子材氣集成五善楊桂叢生視寶桂尤

鉅且繁正符予所取義子淵其真知桂者超異衆人乎
卽中伯仲乃博採內外縉紳題詠凡若干篇彙成一帙
求予序予嘗徧閱諸作其節奏若桂林披風聲響澹平
其旨趣若桂肉薦鼎香味清烈其精采若金粟凝露翠
條經霜勁正佳麗愈久愈懋信足以昭楊氏慶澤於無
窮矣然予以為拘於月者其辭荒離於人者其意蕩皆
不敢尊信必也推原五善循名責實斯盡桂之道乎豈
惟作詩當然凡楊氏為子若孫皆當金玉斯堂用五善
厚培桂本措諸功業則桂日增以盛堂日崇以寧後來
尚有加於此者進士第一甲三人古詞以桂之紅者配
第一黃者配第二白者配第三楊氏叢桂必有此三色

尚培養以就之云是為亭

中州吊古錄序

昔吾同門鄉友董君廷圭字國器舉進士甲科拜監察御史巡按河南時有中州吊古錄一卷其子訓導伯與藏于家後國器以薦陞山東按察司副使旬宣遼東事畢還京卒今工部營繕郎中睢陽尚義中篤念國器知己情不可忘乃就伯與取其錄刻梓以傳四方示後世蓋義舉也河南在中國之中古稱中州繇三代以來聖賢產於茲仕於茲暨流寓於茲者甚衆及其歿也功業歸史書祠墓依郡縣忠烈炳煥英靈發揚與天地同為悠久人誰不敬慕哉然而士大夫拜祠掃墓雖作詩歌

鮮聞有考據事實紀錄無遺者國器此卷獨詳載諸賢生平履履而聲振金玉備寫始終使人視之儼然如親目其人殉國卓立是有繇然矣蓋國器為人志剛毅而性明達博學多能自其幼時讀經考史已慨然以古人自期待及發解鄉闈為憲官屢鋤元姦挫之益勁歷獻忠愍執而不回故其忠烈之氣發泄於此卷諸篇真欲與中州諸賢並駕齊驅於千載之上非徒言而已也不幸功業未竟賁志以歿是可傷哉雖然國器已歿孟子曰以友天下之善士為未足又尚論古之人誦其詩讀其書不知其人可乎是以論其世也是尚交也即孟子之所言觀國器之所志千古同心羣賢一遁不為虛歿

而無益矣初國器在河南雖專戎政尤勤文治凡士流
被其甄拔而造就者今多官顯于朝無慙德而美中
又克表揚其詩文圖為不朽蓋國器此卷能發古人潛
德之幽光而美中此舉亦析發國器潛德之幽光事皆
有關名教不易得也詩序所以言作者之意卷中諸賢
又各有小序吾故總而序之使覽者皆明此意國器有
知將必曰信然

送資縣學教諭魯國英序

尊師道所以隆治道隆治道所以立人道立人道所以
延世道古之善為天下者皆然也嗟夫橫經講堂冀其
受業解惑負笈鄉序望其幼學壯行模範之責關繫特

重今乃苟且付諸希世句讀之士助違芻蕘之人俾為模範則師道弗尊矣師道弗尊而欲治道之隆人道之立世道之延不亦難乎古之善為天下者不若此簡畧是故我

聖天子奮發宸斷勅有司曰自今郡邑師長必取諸進士乙科優其禮待有政蹟者超等擢用弗輕授我朝著諸卿為國遠謀合議曰凡教授學正教諭師儒正官必副榜乃可任外此進者第官訓導為副貳我四方鄉校青青子衿心欲求道者又皆顙望曰安得科名儒來為我師使成德達財有託乎此事理之當然人情之必有者君子為治不可不知也華容魯俊字國英吾兄

子清翁館甥也國英之父德馨翁幕賓雲南衛致仕家
居偕吾兄友善締為婚姻而國英領成化丁酉鄉薦戊
戌舉進士乙科方其別家時德馨翁囑之曰我夫歸老
矣爾弗卑小官當及我健時沾一命吾兄亦曰人子於
父命當謹奉故國英既舉乙科義弗敢辭遂拜成勛資
縣教諭自國英言之為官有命其祿食雖稍薄自資縣
言之為政得人其士風則甚厚矣國英謙和有禮聰敏
好學恭謹外順而貞介內嚴自為諸生至登俊選居其
上者無不愛敬之今教資陰吾見正誼不謀利明道不
計功所謂師道之尊在是教化行風俗義所謂治道之
隆在是彝倫叙紀綱正所謂人道之立在此濟垂後賢久

而弗壞將來者皆襲其餘澤所謂世道之延亦在是秋
滿九載報功於朝或簡牧州縣或超遷清要無乎不
可國英勉之忙師道立則善人多朝廷正天下治此誠
我

聖天子及我朝著諸卿及資陰諸弟子所深願而必欲
得者國英勉之國英之行鄉誥紳京仕者求贈以言吾
老矣不樂以文章誇人兒輩乃謂若韓昌黎之於李漢
朱文公之於黃勉齋皆有言贈知羣從乎於是乎書且
遼期之云

愚菴文集序

都察院右僉都御史繁昌吳公以甲科名進士拜監察

御史克舉厥職超進今官西鎮秦雍羗戎率服東巡淮
楚民物阜康南撫江漢荆衡之地武備既嚴文教益振
然公政與學兼懋雖乘舟攬轡不廢讀書涵養深宏增
益日廣間以餘力纂為載事之記疏為贈言之序考據
為稽古之題跋次為紀實之傳與狀筆之削之為傳信
之表碣志銘一皆自其光明正大心膺中流出不假雕
刻自然成章無事安排從容有序盖用世之文也而吟
風弄月賦詩寫情一憂一樂皆關治道大臣之心繫乎
天下國家如此惟文章之行世其來尚矣三代以前布
在六籍曷嘗有雕刻安排者為哉自夫縱橫變詐之術
熾黃老刑名之學盛放曠清虛馳騁詞章之俗興而語

蕩風雲筆盤錦繡以奔驚竒怪者始接迹於塵海其為
患也根據人心堅不可拔而世道之趨下亦可於此占
焉然吾觀舟車宮室取其便起居而已畫舫雕輿山節
藻稅於起居何加布帛菽粟取其適飢寒而已駝裘猷
錦玉液珍饈於飢寒何益斯之謂雕刻安排無補於人
君子欲為用世之文惟取象於斯乃得其要彼瑣瑣者
烏足與言此 國家觀文成化于茲百年

聖君賢相宗主斯文而培植之陶範之激厲裁抑之曰
歸渾厚都憲公學術有本才氣有源誠足以稱作者矣
斯集也清新發乎平澹之餘縝密藏於廣博之內弗留
斤斧之痕自中繩墨之度傳之天下後世與古文籍並

行於無窮不亦宜乎雖然八音與政通而文章與時高
下今時政美矣吾猶望公敦回隆古之政以復完大音
補三光五嶽之氣之全於今時以振起文章之全盛由
是繹經緒闡皇猷鋪張對天之洪休陳述訓誥麗美
乎伊周斯用世之文之至也維時巴陵教諭林君惟高
彙集公文釐為若干卷綴梓以行余辱公知厚遂不辭
而為之序公名琛字與璧愚菴其別號也故集亦以號云

送武昌府教授梁允直考績序

教化有關於世道尚矣教化者吾儒性分之固有職分
之當為初不假乎官爵之勸也以官爵之勸而任教化
其士風之降乎然自漢唐來則已官與惟君子知其任

我而不求諸人乃克身茲教化以爲人範是則身雖漢
唐以下心則虞周以前也武昌郡文學高要梁先生允
直其知此道歟先生前南流教諭祥應之玄孫新興別
駕至孫之曾孫左春坊左贊善訥中之孫隱者端瑞之
子其慶源深且遠矣先生善爲繼述蚤治春秋領正統
甲子鄉薦戊辰舉進士乙科歷宣化達清二教諭陞今
職自茲仕迄今滿秩逾二十有六年爲天官卿暨督學
憲官所課試者數十皆以優等題其學茂也居官重厚
而安詳不屑屑於貨利不瑣瑣於請求專務教弟子讀
書績文人自敬之其行脩也弟子在福清若戴濟若項
澄若休堉在武昌若徐鏞皆舉進士甲科拜京職他任

州縣者尤多其政立也此三者謂之克身茲教化以爲人範不亦可歟先生雖不假官爵之勸而官爵自不能不行勸矣吾見清資峻級進爲吾道榮爲教化之遠及者不能舍先生而他適也吾誠惜夫今四方儒道罕矣彼情慴者弟子以屢空訴而屢迫於追求杳杳者憲臣以急注拘而急務於縱肆若此者初不識教化爲何物烏足與言此哉然則官爵之勸其專爲此類設歟曰非也此類非官爵所能勸也待官爵之勸而爲善中人也

不待官爵之勸而自無不善中人以上之人也此類斯其下矣先生考績將之京門弟子走數千里來求吾言贈吾言馬足爲先生重哉第吾交四方賢士惟東廣多

文人最謹信先生尤忠厚者今門人求言又忠厚可愛
遂合併書之為遠大期云

送戶部郎中孔弘章陞福建布政司左叅議序

宣聖六十一世孫毘陵孔公弘章舉天順初元進士甲
科拜主尚書戶部事歷員外郎陞郎中成化戊戌春以
薦陞閩藩左叅議蓋自筮仕迄今遷秩凡閱二十有二
年矣公以寬厚諧人心勤慎集公務而誠信謙恭又深
為大司徒所器重功在九重名傳四海實為當代之
蓋臣然必閱二十有二年始獲進一階膺茲
簡命其亦遲遲矣乎雖然今之布政使司古之行中書
省也今之叅議古之副相也士君子幼學壯行屢遷內

職安命待時甫閱二十有二年即至橫金服緋副貳卿
相敷善一方又由此而進之脩政立事恪勤外職顯厥
勲名則踐華陟要以來歸尚可以燕善天下計數後期
亦當必得是則未為遲遲也毘陵之孔實闕里正宗由
宋南渡始遷其子姓之賢弗讓闕里而衣冠文物之盛
過焉仰瞻聖靈自天敷佑其日月之光照臨萬古而常
新江漢之澤流衍千世而長在天下之人共由聖化况
其子孫乎詩曰不愆不忘率由舊章書曰率乃祖之攸
行昭乃辟之有乂皆言子孫不可不守家法也今公起
而敷政八閩無他道焉亦惟守家法以行之云耳所謂
家法者如大學之三綱中庸之九經魯論之五要舉而

措之將使八閩萬物同囿一春今時脩政立事以勤職者在是而異時踐華陟要以來歸者亦在是不徒薇垣之下吏稱其職民安其生而已也公敬圖之公之行同榜諸君子仕於朝者相率祖餞都門而授簡於予敬為書此實相期以無窮事業云

送馬德良陞知湖州府序

古之善為天下者惟使賢智奮庸浚明邦家則民享其利愚不肖簡出退居閑散則民遠其害斯天下自平矣我

皇上聰明天縱諳練世故惟善用是道以作新萬民也是故 嗣登大寶十有四年每三載一朝輒彰善癉惡

大明黜陟使愚不肖下降賢智上升乾開坤闔萬世
入其維持秋歛春生四海皆隨其運轉致理之方孰良
於此哉故城馬公懿字德良其今世縉紳之賢智者歟
公領景泰癸酉京闈鄉薦高第十載辟雍成德達材天
順甲申舉進士甲科拜主尚書戶部事陞員外郎公之
為人蘊恭有感動慎無忽器重於司徒而簡在

帝心恩與褒崇榮及父母其賢有可徵矣成賦中邦會
計允當理財外服出納惟均勢罔虧干利無所染聲名
藹然布滿遠邇其智又有可驗矣歷颺十有五年是為
成化戊戌適

聖天子大明黜陟之期乃繇天官卿薦超進三階陞知

浙之吳興郡惟公之善既彰則朝廷之公道愈顯郡
守之委任愈尊而浙西之民生愈有攸賴公其榮幸矣
哉夫吳興人民性敏柔而聰慧儒風盛行然未流尚華
侈惟賢者優於德足以正其本清其源民俗勤苦而和
順生理給足然積習尚蕪併惟智者富於材足以救其
弊裁其濫斯皆公所優為者進而追蹤古之循吏蜚英
聲騰茂實已權輿於此將來達其賢智兼善天下於是
乎造端焉不徒二千石專善一方而已也昔公舉進士
時予謬職校文詳定優等十五年來見公名重
朝著心竊自喜衡鑑得人矣而公從弟今刑科給事中
添祿又予校藝京闈時所薦魁元其他集門鸞鳳分任

四方者尚多予敢以是為勸哉竭心一公少圖報稱不
意張傑之興乃如是盛耳今公陞秩予所拳拳遠期者
無他亦如唐世楊嗣復薦楊汝士及元白諸士宋世歐
陽脩薦王禹玉及曾子固兄弟四人皆以功名著區區
富貴非所望也公以為何如公之行六科諸公愛厚添
祿亦推其愛厚以及德良請予言贈遂敬書此云